

1 Peturu

Peturu okusiwa ypy maekwerà

Imovyvya

Aã kareta Janejare'e 'Āg omotekokuwaoka Peturu tokusiwa Jesu koty rewarà kō pè maekwerà. Jesu remimo'ekwerà tē Peturu. A'e Jesu nopyteporoive wemimo'earà rā rōmō remē, pira rewarà rōmō tē ekoi mijā. Ajaire Jesu ojivy oo Janejare'e kyty remē, Janejare'e 'Āg omokasi imotekokuwa Jesu koty rewarà kō motekokuwaarà rōmō toiko. Jerusarē taa pè ywesō poromotekokuwa iko ipi (J.K.R. 1—12). Ajawyi Jerusarē taa pe wyi okareta kusiwarerà omono Jesu rē ojirovija mǎe kō pè, tomǎē ee kupa. Temimomorijau kō pè okusiwa, pirujē āmō taa taa rupiwarà kō pè teve.

Peturu ojikuwa ijupe kō

1 ¹Peturu tē ije. Jesu Kiristu remimonokwerà tē ije. Aã kareta akusiwa pejē ajupa, Janejare'e koty rewarà kō rōmō. Akuwa jimomorijau wasua rewarà mō pejisyry penena kō pe wyi pejimosāsāi peo. Ajaate kejō vvy kō pè peiko ky'y. Pōtu vvy pè, Karasia vvy pè, Kapatosi vvy pè, Asia vvy pè, Pitijā vvy pè. A'e a'e vvy kō pè peiko ky'y, napenenai mǎe kō rōmō. Kee a'e ikusiwa pejē:

²Janejare'e pepyteporopa oupewarà kō rōmō tapeiko ky'y. Ajawyi pemowaite wekoa rupi rōmō'ite penereko, o'Āg kasia rupi, āwisō Jesu Kiristu taperovija katu. Āwisō Jesu mǎnōa rupi pepy'aky'a'opa mǎe kō rōmō tapeiko teve. A'evoa rōmō Janejare'e pepyteporopa amǎtejē karamoeve wemikuwa rupi.

Janejare'e ikō tapenereko katu okatuaya rupi nē. Tapepy'amopiryvypy katu teve ikō penereko nē. Age'e ywesō ta'evō penereko.

“Janejare'e pyri peikoa rǎ rē penory jē peiko”, e'i mǎē

³Janejare'e simoe'e ipi, Janerōvijā Jesu Kiristu Ruu. A'e tē janeporijauesaa rupi janepy'amotee janerereko ipi. Kee janerereko. Jesu Kiristu omǎnō janerekovijarerà rōmō. Ajaire Janejare'e omomoera omǎnō

mãe kô pytery pe wyi imopô'ã mijê. Oiko mijê iko ky'y. Ipoeraa rupi Janejare'e janeiko karuarua rã ome'ê jane ky'y. Kee e'ipa jane: “Poroereko karuarutà epyri Jesu rewarà mō”, e'ipa jane. Ajawyi sikuwa aje ywete a'evotà jaiko mã'ê.

⁴Aje, janerereko katua rã simoa'u jaiko. Janeupewarà wemime'ê kô omokatupa amãtejê wena pè janerenone. Awyje nopa'ãi mã'ê tè emime'ê rã. ãmō, nijupa'ãi mã'ê teve emime'ê rã.^a ⁵Janejare'e janerereko jêta okasia rupi janerereko ipi, jajirovija ee remê. Janerereko jêta, ajaate janerereko katua omojikuwaokatà janeupe, janereraa wena pè tijaiko karuaru opyri.

⁶A'evoa rã rè tapenory jê peiko ipi. Akuwa age'e pejimomorigau rã'ite peiko. Wãisō pejimomorigaua kô. Peãgyo rã'ite awijã rè peiko. Ajamã'ê a'evo ipe peiko remê, tapejimokasi jê peiko amê, a'e pejê. ⁷Pejimomorigaua rupi Jesu rè pejirovija jê peiko remê, pejikuwatà Jesu rè pejirovija e'e mãe kô rômō peiko.

Yvy karakuri rè tè poromosã'agatà tapekuwa sa'u. Jesu rè ojjirovija e'e mãe kô vyv karakuri e'e vo. Yvy karakuri jaapy tata pupe remê, ojiky'a'opa katu ipi. Iky'akwerà kōrijō tè ojityku tata rè. Karakuri amê nojitykui. Amê ywesō ikatuay wetetã. A'evo ve jajimomorigau remê, jajikuwa Jesu Kiristu rè jajirovija e'e mãe kô rômō. Karakuri wyi wete epy wete mã'ê vo Jesu Kiristu rè jirovijaa. Karakuri jaapy paire, opa jê kuwa. A'evo rōwã jane, jajirovija e'e Jesu rè remê. Ajawyi karamō Jesu owyjy mijê uu ojikuwa remê, kee e'itã Janejare'e peupewarà mō: “Haa! Ere ojjirovija e'e mãe kô tè awī kō. Ojimomorigau tesō kupa remê, opyta jê tesō ereve iko kupa. Ajawyi areko karuaru kōtã epyri!” e'itã peupewarà mō. Amê sōsi tekou katua opyri ome'êtã pejê ky'y.

⁸Aje, peauvay Jesu ereko ipi, awisō napemã'ei 'ete ipe ee remê. Pejirovija ywete teve ee peiko ipi. Ajawyi penoryvay ee peiko ipi. Manyvo napereko'ãi penorya imomewapa ky'y. ⁹Janejare'e penereko katu peaiwererã wyi penereko ipi, aje pejirovija Jesu Kiristu rè remê. Ajawyi tè penoryvay ee peiko ky'y.

¹⁰Karamoe remeve Janejare'e omojikuwaoka sa'u janerereko katua rã wayvu mojenuarã kô pè, awisō tomojenu amãtejê kupa. Penereko katua rã omojenu amãtejê amê kupa. Nokuwa katui epe wemimojenua kupa, manyvo jaa teipō. Ojipy'amogeta wete ipe ee amê kupa. Kee e'i epe oupe amê kupa: “Manyvotã pō mirã kō rereko katua rã?” e'i oupe amê kupa. ¹¹“Janejare'e Remimuurerã ojimomorigautã omãnō”, e'i imojenu kupa. “Ajaire Janejare'e omomoeratã. Amê sōsi Jōvijã wasu rômō omojikuwaokatã ky'y”, e'i imojenu kupa. Kiristu 'Ag tè awīvoa omojikuwaoka ijupe kô tomojenu kupa. Wemimojenua rè ojipy'amogeta

^a 1.4 Mat. 6.20; Ruk. 12.33

wete jê ipe kupa. “Manyvotà sipō ãwĩvoa?” e'i ikuwa e'ã kupa. “Manyvo remê teve pō ãwĩvotà?” e'i oupe kupa.

¹²A'evoa rã rè Janejare'e Āg omotekokuwa kō amãtejê remê, kee e'i ijupe kō: “Kãramō penenawery pè tè a'evotà”, e'i. Janeupewarà mō a'evoa omojikuwaoka ijupe kō tomojenu kupa. Aekwerà rupi katu tè age'ewarà Janejare'e ayvu mojenuarà kō omojenu janeupe, Janejare'e ayvu e'ey Jesu rewarà. Emimojenuwerà rupi pekuwa penereko katua ky'y. Aje ywete emimojenuwerà kō. Janejare'e Āg kasia rupi tè omojenu kupa. Yva pe wyi omuu maekwerà kasia rupi omojenu kupa, janemotekokuwaa rômō. A'evoa rè Janejare'e remĩgwai yvapewarà kō ipe nokuwa katui ipi.

“Kee tijaiko Jesu koty rewarà kō rômō”, e'i mǎê

¹³Aje, Jesu Kiristu uu tarà mijê ojikuwa Jōvijã wasu rômō. A'evō remê janereraatã wena kyty, opyri tijaiko karuaru ky'y. Ajawyi a'evoa rã rè ywesō tapeja'a peiko. Ja'ave rōwã ikō tapeiko e'ã nê. Tapejireko katu ikō Janejare'e rekoa rupi katu peiko nê. Jesu vãea rã tapearō peiko ipi. “Aje ywete ikatuay wete ererekotã uu mijê remê”, tapejê. ¹⁴Janejare'e taperovija katu ipi, ijãkarãgwerà kō rômō. Jesu napekuwaive remê itōkō, penemimota ai rupi tè peiko ipi mijã. Aekwery vo rōwã tapeiko ky'y. ¹⁵Ivo katuay ikō tapeiko ipi nê. Āwitō Janejare'e aiwererã naikoi 'ete ee, ãwĩvo ve tapeiko, emipyteporokwerà kō rômō. ¹⁶Kee jaa ojikusiwa Janejare'e ayvu: “Nuvei 'ete eaiwererã ere mǎê teãmã ije. Ajawyi ereruparã kō rômō tapeiko”, e'i ikusiwa mǎê.^b

¹⁷Emǎê. Peporegeta Janejare'e pè remê, “Papa” pejê ijupe ipi. Ajawyi tapemomojy wete jê ikō ike yvy rupi peiko jê remeve nê. A'e tè kãramō poromosããga remê, janerekoawerã kō rupi katu janemosããgatã. Ivo mǎe kō pè “ivo” e'itã. Nivoi mǎe kō pè ãmê “nivoi” e'itã. Ojevo jê nivoi mǎe kō wemavopa kō kōrijõtã ity oo. Ajawyi Janejare'e tapemomojy jê ereko, ike yvy pè peiko jê remê, a'e pejê. ¹⁸Penãmōi kō oiko te'ite iko ipi mijã. Eruparã kō rômō a'evō teve peiko ipi mijã. Ajamãê Janejare'e pemomoioka aekwerã wyi tapeiko ky'y. Pepyypa oupewarã kō rômō tapeiko. Karakuri rōwã ome'ê pemomoia repy rômō. Epykwerã opa mǎê rōwã ome'ê. Pekuwa a'evoa. ¹⁹Ta'yry Kiristu tè tesō omãñō peaiwererã repykarã mō. Nuvei 'ete ijaiwererã ee mǎê tè tesō omãñō.^c A'evoa rupi Janejare'e pemomoioka peneko aiwerã wyi tapeiko. Epy wete pemomoia rã ijupe. ²⁰Janejare'e tè Kiristu omuroka pemomoia rã repykarã mō. Yvy jinō e'ãve e'ipa amãtejê. Ajaate uu ojisaoka penereko katuarã rômō ky'y. ²¹A'evoa rupi tè pejirovija ywete Janejare'e rè ky'y. A'e tè omomoeraoka

^b 1.16 Tek. 11.44-45; 19.2 ^c 1.19 Āwitō karamoe remêwarã kō, kaneiru ra'yry mǎrãne'ã ojuka ime'ê Janejare'e pè ipi, waiwererã kō repykarã mō. A'evō ve Kiristu nuvei 'ete ijaiwererã ee mǎê rômō omãñō janeaiwererã repykarã mō.

Jesu omãnõ maire. Jõvijã wasu rõmõ omono ajaire ky'y. Ajawyi tapejirovija jê ikõ Janejare'e rè peiko ky'y nê, a'e pejê. Kee tapejê: “Aje ywete Janejare'e janererekotã wena pè opyri tijaiko karuaru”, tapejê. A'evoa rè tapeja'a jê ipi.

²²Aje, Janejare'e ayvu aje ywete mã'ê rupi katu peiko ipi. A'evonapepy'a ky'ai ijupe peiko ky'y. Pejiauvay peiko ipi, ikoty rewarã kõ rõmõ. Ajawyi kee a'e pejê pemokasia rõmõ. Age'e ywesõ ikõ tapejiauvay peiko nê, a'e pejê. Pepy'a pupe ve tesõ ikõ pejiauvay peiko nê, a'e pejê. ²³Kee rewarã mõ. Penuu tẽ Janejare'e ky'y. Nomãnõ'ãi mã'ê Penuu. Oiko karuaru mã'ê tẽ. A'e tẽ peikoa ipyau mã'ê ome'ê pejê, wãkarãgwerã kõ rõmõ. Wayvu rupi ome'ê, poromoigo mã'ê rupi, nopa'ãi mã'ê rupi. ²⁴Ajare kee jaa ojikusiwapa amãtejê:

“Ãwitõ ka'api'i opa ipi, ãwivo ve mirã kõ ekoi.

Ãwitõ moma'eyva potyry oẽ osinãma opa, ãwisõ ikatuay wete ipe remê, a'evon ve mirã kõ ekoi.

²⁵Na'evon Janerõvijã ywete ayvukwerã ipi.

Mãerã tẽ nopa'ãi”, e'i ikusiwaoka maekwerã.^d

Aekwerã rupi katu Janejare'e ayvu e'ey ojenupa pejê maekwerã.

“Jesu ywesõ ikatuay wete Janerõvijã ywete rõmõ ekoi ipi”, e'i mã'ê

2 ¹Janejare'e ãkarãgwerã kõ rõmõ tẽ pejê peiko. Ajawyi kee tapeiko ãmê. Pirujê nivon tekoua tapeityppyipa. Waria. Ivoa rããga. Jimõarõa. Koivo kõ rè moregeta teitete ai. Wãisõ ajaate oo. ²Janejare'e ayvu rè kõrijõ tẽ ikõ tapeja'a katu peiko ipi ky'y nê. Ãwitõ janesakyri remê janey susury e'ey rè ywesõ jaja'a jaiko ipi, a'evon ve Janejare'e ayvu rè ywesõ tapeja'a peiko ky'y. A'e rupi pejimotekokuwapatã Janejare'e rekoa rè ãmê peiko ky'y. ³Janerõvijã ywete reko katua peããma esa.^e Aje ywete pekuwapa ikatuaya.

“Takuru ikatuay mã'ê vo 'ejê Jesu ekoi”, e'i mã'ê

⁴Pejo ikoty ãmê, Penõvijã ywete tẽ a'e rewarã mõ. Agyvo Janerõvijã ywete. Ãwitõ takuru kõ nomãnõ mã'ê tẽ, a'evon ve nomãnõ mã'ê tẽ ekoi. Ãwitõ takuru tetã rõmõ jainõ remê, takuru ikatuay mã'ê tẽ japyteporo inõ ipi. Nikatui mã'ê ãmê nijaraai. ãwivo ve Janejare'e ikatuay wete mã'ê wesa imuu Janerõvijã ywete rõmõ toiko. A'evon ipe remê, nivon mãe kõ nopotai oõvijã rõmõ toiko. “Nikatui” e'i ywe'e tite ijupewarã mõ kupa. Janejare'e ãmê kee e'i: “A'e ywesõ ikatuay wete”, e'i ijupewarã mõ. Ajawyi a'e Janejare'e omuu Janerõvijã ywete rõmõ toiko. ⁵Pejirovija

^d 1.25 Isa. 40.6-8 ^e 2.3 Jĩg. 34.8

Jesu Kiristu rè remẽ, Janejare'e oja'atà pene ãmẽ. Pe'ÿpyte mã'ẽ rômõ janereinõ janerereko, o'Ãg rena rômõ tijaiko. Agyvo jaiko Jesu Kiristu remipyteporokwerà kô rômõ jaiko. Jamoe'eoka Janejare'e jane kô pè jaiko ipi. Japoregeta teve ijupe jane kô pewarà mõ jaiko ipi. A'evo jaiko remẽ, Janejare'e oryvaytà janere iko ãmẽ ipi. Ajawyi a'evo ikô tapeiko ãmẽ nẽ, a'e pejẽ.

⁶Janerõvijã ywete pewarà mõ kee ojikusiwapa amãtejẽ Janejare'e ayvu rômõ karamoe remẽ:

“[Aesapa mirà kô Rõvijã ywete, a'e ywesõ ikatuay wete mã'ẽ.]
 ãwitõ tetã reinõgarà kô takuru tetã oinõtã remẽ,
 takuru ikatuay mã'ẽ ypy wesa tetã momãatãã rômõ.
 A'evo ve ikatuay wete mã'ẽ aesapa mirà kô Rõvijã ywete rômõ
 toiko.
 A'e erena Jerusarẽ taa pè ekoità, Sião vyvytyry pè ekoità.
 Ava mõ sô ojirovija ee oõvijã rômõ remẽ,
 nojirovija pãn'ãi ãmẽ ee”, e'i maekwerà.^f

⁷Aje, Jesu rè ojirovija mãe kô tẽ pejẽ ky'y. Ajawyi epy wete mã'ẽ rômõ tẽ Jesu pejẽ. Na'evoi nojirovijari ee mãe kô. A'e kô pewarà mõ kee jaa ojikusiwapa amãtejẽ:

“ ‘Aã takuru nikatui!’ e'i ywe'e tite tetã reinõgarà kô oinõ ypy
 takuru tetã rômõ remẽ.
 A'e takuru ywesõ sikaepo ikatuay wete mã'ẽ tetã momãatãã rômõ”,
 e'i maekwerà.^g

A'evo ve Jesu ywesõ sikaepo ikatuay wete mã'ẽ Janerõvijã ywete rômõ ekoi. ⁸Kee e'i teve Janejare'e ikusiwaoka amãtejẽ Jesu pewarà mõ: “*Jajipyãkãmota mã'ẽ vo 'ejètã tẽ a'e takuru*”, e'i.^h Jesu ayvu noerovija tari mãe rã kô pewarà mõ tẽ aepo e'i amãtejẽ, ojimoape kôrijõ Janejare'e ayvu renu tare'ã mãe rã kô pewarà mõ. A'e kô Janejare'e remiemavo kô rômõtã ekoi, noerovija tari ijayvukwerà rewarà mõ.

⁹Pejẽ ãmẽ Janejare'e remipyteporokwerà kô rômõ peiko ky'y, pe'ÿpyte mã'ẽ rômõ. Oupe oporanu mãe kô rômõ peneinõ. Okoty rewarà kô rômõ penereko ãmẽ, eruparà mõ tapeiko, ijupewarà kô rômõ tapeiko. Pãtõnusu rupi wata mã'ẽ vo 'ejẽ tẽ pejẽ peiko mijã. Ajamã'ẽ pemoẽ okoty, aryvo rupi wata mãe kô vo 'ejẽ tapeiko ky'y, ãwisõ ekoa ikatuay wete mã'ẽ tapemojenu erokwa.ⁱ ¹⁰Emiporijauesa kô rōwã pejẽ

^f 2.6 Isa. 28.16 ^g 2.7 Jĩg. 118.22 ^h 2.8 Isa. 8.14-15; Rom. 9.33 ⁱ 2.9 Jĩsyry. 19.5-6; Tit. 2.14; Isa. 9.1-2

mijã. Ikoty rewarà kō rōwã teve pejë mijã. Age'e okoty rewarà kō rōmō penekyipa penereko ky'y. Wemiporijauesa kō rōmō teve penereko ky'y.^j

“Janejare'e rekoa rupi katu ikō tapeiko ipi nē”, e'i mǎ'ē

¹¹Tapejapyaka katu ikō eayvukasia rè nē, ejimorypa eremiau kō. Napenenai mǎe kō rōmō tē pejë ike yvy pē peiko, Janejare'e rena tē penena e'e rewarà mō. Ajawyi ikō peneko aiwerà rupi tapeiko e'ã peiko ipi nē, a'e pejë. Upi sō peiko tite remē, ipojytà pejë ãmē ky'y. Napeja'a'ãi Janejare'e rè ãmē peiko ky'y. Napeiko'ãi teve Jesu reve ãmē peiko.

¹²Ivoe'e mǎ'ē rōmō ikō tapejikuwa jane kō rovake peiko ipi nē, Janejare'e nokuwai mǎe kō rovake. Nivoi mǎ'ē omo'y jē tarepe maevo pene kupa. Ajamǎ'ē ava noerovija'ãi ijayvu ai kō penewarà mō, ivo peikoa ojikuwapa rewarà mō. “Ivo ekoi kupa”, e'i kōrijõtà pene omǎjã ãmē kupa ky'y. Maevo aepo e'i maekwerà kō ve ojirovijatà Janejare'e rè ajaire penewarà mō. Ajawyi Janejare'e uu mijē poromoe'yi remē, a'e kō omoe'età Janejare'e penewarà mō ky'y, ovaque ywete.

“Jōvijǎgwerà kō tapemomojy ipi”, e'i mǎ'ē

¹³Janerōvijǎ ywete opota ivo jaiko ipi. Ajawyi ikō tapemomojy penōvijǎgwerà kō ipi nē, a'e pejë. Jōvijǎ wasu kō ywesō tapemomojy ikō ipi nē, a'e ywesō mirà kō wyi ijayvukasi mǎ'ē rewarà mō. ¹⁴Kovenatu kō ve tapemomojy peiko, jōvijǎ wasu tē opyteporo kō nivoi mǎe kō momorijauarà kō rōmō toiko kupa rewarà mō. Ivo mǎe kō moe'earà rōmō teve opyteporo kō toiko kupa. Ajawyi a'e kō ikō tapemomojy peiko ipi nē, a'e pejë. ¹⁵Janejare'e opota a'evō tijaiko ipi. A'evō jaiko remē tē, e'i teywete mǎe kō manyvo ne'i'ãi nivoi mǎ'ē mo'y janere ipi. ¹⁶Ãmō, kee a'e pejë. Awitō jōvijǎ ãkarǎgwerà kō wemimotarà rupi tē ekoi ipi. Ovote ojireko iko kupa ipi. A'evō ve jajireko tē jaiko, Jesu koty rewarà kō rōmō. Ajamǎ'ē kee tapejē tite e'ã: “Nimanyvoi nivoi aiko remē”, tapejē tite e'ã ikō peiko nē, Janejare'e remīgwai kō rōmō tē pejë peiko rewarà mō. Ajawyi oterē jē emimota rōmō tē peiko. ¹⁷Pirujē mirà kō ikatuay tapereko ereko ipi. Janevoarà kō tapeauvay Jesu koty rewarà kō rōmō peiko. Ãmō, Janejare'e tapemomojy wete teve peiko. Ãmō, jōvijǎ wasu yvy pewarà tapemoe'e teve peiko. A'evō tapeiko ipi ãmē.

¹⁸Temīgwai kō, kee a'e pejë. Taperovija katu ikō penōvijǎ kō peiko ipi nē. Tapemomojy kō teve peiko ipi. Ikatu peupe mǎe kō kōrijō tē rōwã ikō tapemomojy ipi nē. Oja'a katu pene mǎe kō kōrijō tē rōwã teve. Penōvijǎ nikatui mǎ'ē tapemomojy jē teve peiko ipi. ¹⁹Kee tapejē: “Janejare'e remimota rupi aikotà”, tapejē ipi. Ãmō kō sō pemomorijau remē, tapejimoane'e jē ivo peikoa rè peiko ipi. Pekuwa Janejare'e opota

a'evo tijaiko mǎ'ě. Ivo peiko penereko ai epe kupa remě, Janejare'e tē penereko katutà okatuaya rupi ǎmě. Orytǎ pene iko ǎmě. ²⁰Nivoi ekoi mǎ'ě jamomoriĵau teǎmǎ ipi. Nojikō'ōi omomoriĵaua rē remě, “Nivoi mǎ'ě tē ene”, taoty jē ijupe. Nijamoane'e jē'ǎi apijarà. Ajamǎ'ě ivo peikoa rewarà mō sō pemomoriĵau ipe kupa remě, tapejikō'ō e'ǎ ee peiko. A'evo peiko remě, aje Janejare'e tē pemoe'età penereko.

**“Tijajipy'amogeta Jesu Kiristu ojimomoriĵau
omǎnō maekwerà rē”, e'i mǎ'ě**

²¹Kiristu kōrijō tē ivo ekoi mǎ'ě. Emǎ'ě. Ojimomoriĵau jē tesō penekovijarerà rōmō omǎnō. A'evo ojisaoka pejē, manyvo tapeiko pejimomoriĵau remě. Eruparà rōmō tapeiko ǎmě. A'evoa rōmō Janejare'e pepyteporo, Kiristu reruparà mō tapeiko. ²²Nuvei 'ete Kiristu aiwererà mō ee. Aje ywete mǎ'ě rē kōrijō tē oporegeta ipi.^k ²³Temimoĵaiwe rōmō ipe wereko kupa remě, noovaja kōi. A'evo ve omomoriĵau kupa remě, “Ajipytǎ pene”, ne'i. Noovaja kōi. Nipui kōrijō ijupe kō. Janejare'e rē kōrijō tē ojirovija opǎtavōarà rōmō, a'e ivo katu tē poromosǎ'aga ipi rewarà mō.^l ²⁴Ipowyi tesō janeaiwererà janere mijǎ. Ajamǎ'ě Jesu wekyipa janewyi ky'y. A'e repy rōmō omǎnō yvyra jipokana rē. Janerekovijarerà rōmō omǎnō, ǎwisō janeaiwererà tikasi e'ǎ janere ky'y. ǎwisō ivoa rupi kōrijō tē tijaiko teve. Ojimomoriĵaua rupi janerereko katupa ǎmē ky'y, ayay tesō ijupe mǎ'ě rupi. ²⁵ǎwitō kaneiru kō oo tite wemimotarà rupi oopa rōmō, a'evo ve penemimota aiwerà rupi peiko tite remě mijǎ. Age'e pejivypa Jesu kyty peiko ky'y, pene oja'a katu mǎ'ě kyty.^m

Ojireko mǎe kō rewarà

3 ¹Iměma mǎe kō, kee a'e pejē. Ikatuay ikō pemēnà pereko ipi nē, penerekoarà rōmō, pe'arà kytywarà rōmō. Janejare'e ayvu rupi sō noikoive pemēnà remě, ikatuay jē ǎmē pereko. Ivo katuay peiko eeve remě, nevo ve Janejare'e rē ojirovijatà maevo kǎramō. Neporegetaa rupi rōwǎ a'evotà ekoi. Ivo katuay peiko mǎ'ě rupi tē.ⁿ ²Kee e'itǎ peupewarà mō ǎmē: “Wǎivī e'eay tē ererekwarà ipi. Ivo katuay ereve ekoi ipi. Janejare'e rē ojirovija rewarà mō a'evo ererekwarà. Tǎwīvo ve ije ǎmē aiko”, e'itǎ ǎmē pejē. ³Uve wǎivī mō opirǎ rova'arà mogǎtarōa rē ywesō oja'a mǎ'ě. Ajawyi wapira mōĵǎa rē ywesō oja'a ipi. ǎmō, opo'yry rē ywesō oja'a. ǎmō, oyru katuay mǎ'ě rē ywesō oja'a. A'e kō vo rōwǎ tapeiko.^o ⁴Ke'iatu tē mǎ'ě rōwǎ a'e ǎmē. Ikatusa rupi tapeiko. Pepy'a katua rupi tapeiko. Mǎerǎ tē a'evo tapeiko. ǎwīvo peiko remě tē Janejare'e orytǎ pene iko. A'evo jaiko mǎ'ě ywesō opota Janejare'e ipi.

^k 2.22 Isa. 53.9 ^l 2.23 Isa. 53.7 ^m 2.25 Isa. 53.5-6 ⁿ 3.1 Eps. 5.22; Krs. 3.18
^o 3.3 1Tim. 2.9

⁵ A'evo wãivĩgwerà karamoe remēwarà kō, Janejare'e rē ojirovija katu mǎe kō. A'e kō ivo katuay omēnà kō reve ekoi ipi. Ivo katuay wete mijēsì ekoi kupa. ⁶ Tāmō Aparão rerekwarà amyry a'evo ekoi, sa'i Sara eu erà pè mǎ'ē.^p “Erōvijā” e'i omēnà pè ipi. A'e reruparà mō peikotà, ivo peiko remē. Āmō, napejirokyjei remē tè eruparà mō peikotà. [Aepo a'e kōrijō eayvukasia rōmō, imēma mǎe kō pè.]

⁷ Āmō, erekwapa mǎe kō pè kee a'e teve. Ikatu ikō penerekwarà kō pereko ipi nē, a'e pejē. Tapeja'a katu ikō ee kō ipi nē, pejē ywesō pekasi iwyi kō rewarà mō. Taperōarō e'ā ikō penerekwarà kō ereko nē. Janejare'e remipyteporokwerà kō teve penerekwarà kō. Āwitō emipyteporokwerà kō tè pejē, ipyri peiko karuaru mǎe rā kō rōmō, āwīvo ve penerekwarà kō. Ajawyi nivo'āi perōarō kō remē. Nivoi pereko kō remē, Janejare'e nojapyaka'āi peayvu rē āmē, peporanu ijupe remē. [Aepo a'e eayvukasia rōmō, erekwapa mǎe kō pè.]^q

Ivo tekoua rewarà

⁸ Kee a'e pirujē pejē. Jesu py'a rupi katuwarà rōmō tapeiko, pe'īpypte rōmō, a'e pejē. Ava mō ijāgyo remē, peporijauesa ikō āmē ipi nē. Ory remē, ivo ve penoryvay ikō ee peiko nē. Pejiauvay ikō peiko nē, Jesu koty rewarà kō rōmō. Ojimomorijau mǎe kō peporijauesa ve ereko ipi. “Ije ywesō”, tapejē tite e'ā poroerōarō ipi. ⁹ Ava mō sō pemojaiwe penereko remē, tapeovaja e'ā. Ijavyu ai sō pejē remē, tapeovaja e'ā ikō āmē nē. Kee tapejē kōrijō ijupewarà mō: “Hoō, Janejare'e toereko katu kō, owaray toiko kupa”, tapejē kōrijō āmē. A'evo Janejare'e opota tapeiko ipi. A'evo peiko remē, owaray penerekotà. ¹⁰ Kee jaa ojikusiwapa Janejare'e ayvu rōmō:

“Pepota penory peiko remē, kee tapeiko ipi.

Tapeporegeta teitete e'ā ikō peiko ipi nē. Tapewari e'ā teve ikō peiko ipi nē.

¹¹ Tapejimosātāmy ikō nivoi mǎe kō wyi peiko ipi nē.

Ivo katu ikō tapeiko mirà kō rerekoarà rōmō peiko nē.

Mirà kō py'amopiryvypy katua rē ikō tapeposiko ipi nē.

¹² Ivo ekoi mǎe kō rē Janerōvijā ywete oja'a iko ipi.

A'e kō oja'o ojiporijauesaoka ijupe remē, ojapyaka āmē ee kō iko ipi.

Nivoi mǎe kō rē āmē nojapyakai ipi.

Ojirova kōrijō iwyi kō ipi”, e'i maekwerà.^r

Kiristu koty rewarà kō rōmō jajimomorijaua rewarà

¹³ Pejimokasiay ivoa rupi peiko remē, ava mō napemojaiwe'āi penereko. ¹⁴ Ajamǎ'ē ivoa rupi peiko rewarà mō sō pemomorijau ipe

kupa remê, Janejare'e owaray penereko jêtà ãmê. Ajawyi tapekyje e'ã ikõ pemomoriyawarera kô wyi peiko ipi nê. Tapejimonyi e'ã ikõ iwyi kô peiko ãmê nê.^s ¹⁵Aje ywete Jesu Kiristu ywesô ikõ tapemomojy Penôvija ywete rômô ipi nê, pepy'a pupe ve. Kee a'e teve pejê. Tapetekokuwavay amãtejê peayvu rã rê kee e'i pejê kupa remê: “Manyvora pô Kiristu rê nejirovija ywete?” e'i oporanu pejê kupa remê. Tapemotekokuwa kô ikõ peiko ãmê nê. Ikatusa rupi ikõ tapemotekokuwa kô ereko nê. Taperôarô kô e'ã ikõ pemotekokuwa kô remê ereko nê.^t ¹⁶Ãmô, tapejireko katu amãtejê ikõ ivo tekoua rupi peiko ipi nê. ãmê tê kee napejê tite'ai: “Nivoi sipôkô aiko mijâ!” napejê tite'ai. ãwivo peiko remê si, peapã kô oporegeta teitete sikaepo pene remê, ovote ojimosioka ywetetã owariawerã rê kupa, ivo peikoa ojikuwatã ijupe kô rewarã mô. ¹⁷Pemomoriyau ipe kupa remê, Janejare'e pemoe'e jêtà penereko, emimota rupi tê sikaepo a'evo peiko remê. Nivoi peiko rewarã mô rôwã pemomoriyau kupa. Ajawyi tapejimosioka e'ã a'eva rê peiko. Nivoi peiko remê tê kuwa pejimosioka kuwa peiko. ¹⁸Emãê.

Kiristu ywe'e ipe ojimomoriyau omãno.

Pirujê janeaiwererã repykarã mô omãno.

ãwivo ivo katu mãê pe'tyete omãno nivoi mãe kô pewartã mô.

A'evo penerojivyri Janejare'e kyty, mãerã tê rômô tapeiko.

A'evo ojuka Jesu kupa remê, ipirã omãno.

Ajaire Janejare'e 'Ag omomoera mijê remê, i'ãg omojivyri mijê imoige eãgwerã pupe imomoera.

A'e sôsi nomãno'ai mãê rômô opoera iko ky'y.

¹⁹Omãno remê Kiristu oo taywerã kô mogeta, jimopã'aga pè tui kupa remê. ²⁰Karamoe remêwarã kô raywerã kô omogeta, Janejare'e ayvu noerovijai maekwerã kô raywerã kô. Karamoe remê tãmô Noe ekoi remê itôkô Janejare'e wãrô puku ipe tojirova weko aiwerã kyty wyi kupa mijã. Nawiu Noe oinô upa remê, wãrô puku jê. Ojinôma remê, ijayvu werovija mãe kô kôrijô tê oike ipupe. Nijatyi kupa. Kejô. 8 rômô kôrijô tê oike kupa.^u A'e kô kôrijô tê opyta, yy poru ãmô kô weroikepa remê. ²¹Aekwerã rê jaja'a remê, janejãmorã rê jaja'a ve. Jajimojãmorã remê, janepirã ky'a'oa rômô rôwã a'eva. Aje ywete, janepy'a kyty wyi, kee ja'e Janejare'e pè: “Neupewarã rômô aikotã”, ja'e. A'evo ekoi mãê kee e'i kuwa: “Awyje Janejare'e pewartã mô taiko”, e'i kuwa. Ajawyi janemoigooka karuarutã opyri. Jesu Kiristu opoera mãnoa wyi rewarã mô a'evo janererekotã opyri ky'y. ²²A'e itôkô oema oo yva kyty, Janejare'e rena kyty. Uu pyri tê ekoi

^s 3.14 Mat. 5.10 ^t 3.15 Isa. 8.12-13 ^u 3.20 Noe kôrijô tê, werekwarã reve. Ta'yry kô moapy rômô, erekwarã kô reve. Mokopejô. Jinô. 6.1—7.24

ky'y, Jōvijā wasu rōmō. Yvapewarà kō 'arà kyty ekoi. Āmō, ija mǎe kō 'arà kyty ekoi teve. Pirujē ikasiy mǎe kō 'arà kyty ekoi, nomǎētyti ee mǎe kō 'arà kyty. Āwī āwī kō nikasi ovake.”

“Janemoai epe kupa remē, Janejare'e ayvu rupi tijaiko jē jaiko”, e'i mǎē

4 ¹Kiristu ojimomorijauway janeupewarà mō omānō, ike yvy pè. A'evo ekoi rewarà mō tapejimokasiy ekoa rupi peiko jē rōmō, pejimomorijau ipe remē. Kee tapejē: “Nimanyvoi emomorijau kupa remē. Janejare'e remimota rupi aiko jētā āmē”, tapejē kōrijō āmē.

Kiristu rē jajirovija mǎe kō rōmō jajimomorijau remē, nivoi jaiko mǎē rē nijaja'a'āi āmē ipi. ²Ajawyi awyje Janejare'e remimota rupi katu tapeiko ky'y, a'e pejē. Penemimotarà rupi rōwā tapeiko ky'y. Janejare'e noerovijai mǎe kō remimotarà rupi rōwā teve tapeiko. ³A'e kō vo ywete itōkō peiko mijā, Janejare'e napekuwaive remē. Paporai remē itōkō peka'uay wete ipi mijā. Peka'u py'y py'yi peiko ipi mijā. Āmō itōkō, pejimomy'aa rē ywesō peja'a ipi mijā, penemimota ai rupi peiko rewarà mō. Pepararakai tē peiko ipi mijā. Āmō, penemimoātāgwerà kō pemoe'ē rā'āga pejarà rōmō ipi mijā. A'evo pejimojaiweray tesō peiko ipi mijā. Na'evoi peiko ky'y. Janejare'e remimota rupi katu tē peiko ky'y. ⁴Ajawyi Janejare'e noerovijai mǎe kō omǎē pene remē, kee e'i kupa: “Manyvore sipō janevo rōwā ekoi kupa ky'y?” e'i kupa. “Janevo kuwasi ekoi kupa mijā”, e'i penewarà mō kupa. Ajawyi penojai tē kupa ky'y. ⁵Kāramō aepo e'i mǎe kō ojimome'utà Janejare'e rovake, poromoe'yi remē. A'e 'arà mē pirujē mirà kō ojimome'utà ovake. Nokājāive mǎe kō. Āmō, okājāma mǎe kō ve. ⁶Āwīvotà jaiko rewarà mō Janejare'e ayvu e'eay Jesu rewarà ojenupa omānō maekwerà kō pè. Ipirà kō omānō ijaiwererà repy rōmō. Pirujē mirà kō a'evo omānō ipi. Ajamā'ē Janejare'e opota a'e kō opyri toiko karuaru. Ajawyi wayvu e'eay omojenuokapa ijupe kō, āwisō tojirovija ee kupa ky'y.

“Kee tijaiko Jesu koty rewarà kō rōmō”, e'i mǎē

⁷Ke'ī pirujē oiko mǎe kō opatà. Ajawyi tapejireko katu jē Janejare'e rovake peiko ipi. Ja'ave rōwā jaiko remē, nijaporegetai sō ijupe ipi. Ajawyi ja'ave rōwā tapeiko e'ā ipi. ⁸Tapejiauvay peiko, a'e pejē. Ta'evoyay peiko. Aje poroauvay peiko remē, napeja'a'āi nivoi penereko maekwerà rē āmē ky'y. “Awyjepa” pejētā pemoaiarerà kō pè āmē ipi.”

⁹Āmō, kee a'e pejē. Pevoarà kō ovāe pepyri ipi remē ikō tapemomyta pepyri ipi nē. Kee tapejē e'ā: “Napotai opyta epyri”, tapejē e'ā ikō nē. ¹⁰Janejare'e janereinō iteetejē āmō āmō rupi tē tijaiko. Ajawyi iteetejē janeremikuwa kō ome'ē janeupe okatuaya rupi, āwisō tijajimokasi

v 3.22 Rom. 8.38; Eps. 1.21; Krs. 1.16; 2.10 w 4.8 P.Teko. 10.12

ojeevejẽ jajipãtavõ. Ajawyi kee a'e pejẽ. Penemikuwa rupi tẽ toporopãtavõ peiko ipi, pejãvijõ jẽ. A'evõ peiko remẽ, Janejare'e orytã pene ãmẽ.

¹¹Ma'e. Ayvu mojenuarã rõmõ peiko remẽ, ãmẽ si Janejare'e ayvu tẽ tapemojenu erokwa ipi. Poropãtavõarã rõmõ peiko remẽ, Janejare'e kasia rupi tẽ a'evõtã peiko ipi. ãmẽ a'e a'evõ peikoa rè omã'ẽ mãe kõ omoe'tã Janejare'e penewarã mõ ãmẽ. Kee e'itã ãmẽ kupa: “Haa! Ene ywesõ nekatuay wete, Janejare'e”, e'itã ijupe imoe'e Jesu Kiristu koty rewarã kõ rewarã mõ kupa. A'e ywesõ ikasiay wete mã'ẽ rõmõ ekoi ipi! A'e ywesõ ikatuay wete mã'ẽ rõmõ ekoi teve ipi! Oiko karuarutã Jõvijã wasu rõmõ iko! Ôõ, awyje katu ãwivo jamoe'e karuaru jaiko ipi.

Jajimomoriãu remẽwarã

¹²Kee a'e jẽ pejẽ, eremiau kõ. Pejimomoriãuvay remẽ ikõ tapejiapy'a e'ã ipi nẽ. Kee tapejẽ e'ã: “Manyvore sipõ?” tapejẽ e'ã teve. Pejimomoriãu ipe remẽ, tapejimokasi jẽ Janejare'e rè pejirovija. ãmẽ si pejikuwatã Jesu koty rewarã e'e kõ rõmõ peiko ky'y. Ajawyi tapejiapy'a e'ã, a'e pejẽ.

¹³Tapenory katu kõrijõ Jesu reruparã mõ peiko, pejimomoriãu ipe remẽ.

ãwitõ Kiristu ojimomoriãuvay, a'evõ ve pejẽ peiko. Ajawyi tapenory katu jẽ peiko, a'e pejẽ. ãmẽ sõsi penoryvay wetetã kãramõ, Jõvijã wasu rõmõ ojikuwa uu mijẽ remẽ. ¹⁴Ava mõ sõ penereko ai Kiristu rewarã mõ remẽ, “aje ipõ” tapejẽ ywe'e tite e'ã ijupe kõ. Tapenory katu jẽ peiko ãmẽ, Janejare'e 'ãg ikasiay mã'ẽ tẽ penevejẽ ekoi rewarã mõ. ¹⁵Ajamã'ẽ pejimomoriãu remẽ, napotai nivoi peiko rewarã mõ pejimomoriãu.

Ma'e. Porojuka peiko rewarã mõ. ãmõ, pemonã peiko rewarã mõ. ãmõ, mirai mõ peiko rewarã mõ. ãmõ, poromovyvyrai teywete proereko rewarã mõ. Wãi wãisõ iteetejẽ rewarã mõ rõwã tapejimomoriãu peiko. ãwĩ rapijarerã ojimosiõka kuwa iko ãmẽ. Ojimomoriãu teve kuwa iko ãmẽ. ¹⁶Ajamã'ẽ Kiristu koty rewarã rõmõ sõ pejimomoriãu remẽ, tapejimosiõka e'ã pejimomoriãua rè ãmẽ. Janejare'e kõrijõ tapemoe'e peiko. A'evõ peiko remẽ pejikuwatã ikoty rewarã e'e kõ rõmõ.

¹⁷ãmõ, kee a'e pejẽ. Ke'ĩma poromoe'yarã ovãe iko. A'evõ remẽ Janejare'e pirujẽ mirã kõ omosã'ãgatã ãmẽ. Okoty rewarã kõ ypy omosã'ãgatã. Jane ypy. Tysi tõ ijayvu e'eay noerovijai mãe kõ pẽ ipojytã tẽ, omosã'ãga kõ remẽ. ¹⁸Kee jaa ojikusiwapa Janejare'e ayvu rõmõ:

“ãpẽi sa'u ivo ekoi mãe kõ rereko katua.

Tysi tõ nivoi mãe kõ. Naikoi ereko katua”, e'i maekwerã.^x

¹⁹Ajawyi kee a'e pejẽ, pemokasia rõmõ. Pejimomoriãu Janejare'e remimota rupi remẽ, ivo tapeiko jẽ. Tapejime'ẽ peneinõgarerã po pẽ ãmẽ,

^x 4.18 P.Teko. 11.31

a'e noity'ái 'eteay okoty rewarà kō ipi rewarà mō. Wereko katu kō wayvru rupi katu ereko kō ipi.

“Kee Jesu koty rewarà kō rōvijāgwerà kō toiko ipi”, e'i mā'ē

5 ¹Age'e akusiwatà imotekokuwa Jesu koty rewarà kō rōvijāgwerà kō pè.^y Kee a'e pejë. Āwitō jōvijā kō tē pejë, āwīvo ve ije. Ije ywete amā'ē Kiristu rē ojimomorijau omānō remē. Ajawyi eremisakwerà tē amojenu erokwa ipi. A'e kāramō Jōvijā wasu rōmō ojikuwa tarà mijē uu. A'evo remē ije ve ipyri aikotà. Āmē sōsi ipyri eroryvaytà ipyriwarà rōmō aiko amē ky'y. ²Janejare'e pepyteporopa wākarāgwerà kō rerekoarà kō rōmō tapeiko. Āwitō kaneiru jarà oja'a katu weima kō rē ipi, āwīvo ve tapeja'a katu Jesu koty rewarà kō rē ipi, a'e pejë. Janejare'e tē pemoja'aoka ee kō.^z Ajawyi “hoō” tapejë. “Apota aja'a ee kō, a'evoa rōmō Janejare'e tē epyteporo rewarà mō”, tapejë. Kee tapejë e'ā: “Napotai aja'a ee kō”, tapejë e'ā ipi. Kee tapejë: “Apota katu imokasi kō, āwisō totekokuwaway Jesu rekoa rē kupa”, tapejë teve ipi. Karakuri rewarà mō kōrijō tē rōwā tapeja'a ee kō ajamā'ē. ³Āmō, kee a'e pejë. Pemotekokuwa kō remē, tapejimokasi ai e'ā ee kō ajamā'ē. Jōvijā aiwerà rōmō tapeiko e'ā ee kō. Aje, Janejare'e rekoa rupi kōrijō tē tapeiko eeve kō. Āmē tē peja'a ee mē kō okuwatà manyvo Janejare'e opota tijaiko ipi. Omā'ē pene kupa remē, peneruparà rōmō ekoitā amē kupa. ⁴Jesu Kiristu tē pemoja'aoka okoty rewarà kō rē. Penōvijā ywete tē a'e. Ajawyi a'e renone ikō tapeja'a katu ikoty rewarà kō rē ipi nē, a'e pejë. Āmē tē ovāe remē, ākānytarà ikatuay mā'ē ome'ētā pejë amē, pemoe'ea rōmō. Māerā tē iserenyny karuarutā amē neapyte 'aryvo, peja'a katu ikoty rewarà kō rē peiko ipi rewarà mō. [Awyjepa rā'ī aepo a'e jōvijāgwerà kō pè.]

⁵Kee a'e teve kōnomiokyry kō pè. Taperovija katu ikō penōvijāgwerà kō ayvu ipi nē, a'e pejë.

Kee a'e teve pirujē pejë. Tapejierōarō e'ā ikō Jesu koty rewarà kō reve peiko ipi nē, a'e pejë. “Ije ywesō” tapejë ywe'e tite e'ā ojiupe ipi. “Emoe'e kuwasi kupa mijā”, tapejë e'ā teve ipi. Aje, poropātavōa rē ywesō tapeja'a ipi. Kee jaa Janejare'e ayvu ojikusiwapa: “*Janejare'e nopotai poroapyrasa mē kō ipi. Ajamā'ē noporoapyrasai mē kō rē oja'a katu ipi*”, e'i maekwerà.^a

⁶Āmō, kee a'e pejë. Janejare'e po pè kōrijō ikō tapejime'ē ipi nē, ikasiay rewarà mō. Āmē sōsi pemoe'etā penereko ky'y. Pemoe'ea 'arà remē tē pemoe'etā penereko ajamā'ē.^b ⁷Āmō, kee a'e pejë. Pejipy'amopirai tekoua rē ipi remē, a'evoa tapemome'u Janejare'e pè ipi, oja'a katu pene ipi rewarà mō.

^y 5.1 Karai kō *presbítero* e'i āwī rapijarà pè. ^z 5.2 Juw. 10.11-13; 21.15-17 ^a 5.5 P. Teko. 3.34; Tku. 4.6 ^b 5.6 Mat. 23.12; Ruk. 14.11; 18.14

⁸ Āmō, tapemārāmoa'u katu ikō peiko ipi nē. Ja'ave rōwā ikō tapeiko e'ā nē, peāpā tē ājāgai rōvijā rewarā mō. Āwitō jawarā ka'aporā rōvijā wata ojivy jivy wemijatarā moa'u ipi, āwīvo tesō ājāgai rōvijā pemoa'u ipi. ⁹ Tapejimomāatā jē ikō Janejare'e rerovijaa rupi ājāgai rōvijā wyi ipi nē, a'e pejē. Pejimomorijau peiko remē, kee jaa rē tapeja'a. Pejē rōmō'ī rōwā pejimomorijau peiko ipi. Pirujē Jesu koty rewarā kō āwīvo ekoi ipi. Āmō yvy yvy pewary ve āwīvo ekoi. Ajawyi tapejimokasi jē Jesu rē peiko, āwīvo peiko remē, a'e pejē. ¹⁰ Pejimomorijau remē, pejimomorijau ke'iatutā tē. Pejimomorijau karuaru rōwātā ajamā'ē. A'evo paire Janejare'e pyri peiko karuarutā, Kiristu revejē peiko ky'y rewarā mō. A'eva rōmō Janejare'e pepyteporopa. A'e poroereko katu okatuaya rupi ipi. Penauvay ipi. Pemokatutā pejimomorijau paire. Pemokasitā tapejimomāatā jē penereko. ¹¹ Jōvijā wasu e'eay rōmō Janejare'e oiko karuaru. Ō'ō, awyje katu a'evo ekoi.

Kareta moawyjepaa

¹² Aā eayvu Sirasi^c pē akusiwaoka peupewarā mō maekwerā. Eretārā vo ywete Sirasi, Jesu koty rewarā rōmō. Temirovija ywete rōmō ekoi. Aā eremikusiwarerā amonotā pejē pemotekokuwaa rōmō. Kee a'e teve pejē: Penereko katua rupi pekuwa aje ywete Janejare'e poroereko katu ipi, a'e pejē. Penaua rupi ikō tapejimokasi jē pejimomāatā ipi nē, a'e pejē.

¹³ Janejare'e remipyteporokwerā kō Papironi^d taa wānā kō opota ojimory pene eremikusiwarerā rupi. Era'yry vo mā'ē ve opota ojimory pene eremikusiwarerā rupi, Maku eu ijupe mā'ē.^e ¹⁴ Tapejimory katu ikō ojee ipi nē, Jesu koty rewarā kō rōmō. A'evo tapeiko jē peiko ipi.

Janejare'e tapepy'amopiryvypy katu ikō penereko ipi nē, Kiristu revejē peiko māe kō rōmō.

^c 5.12 Siuvanō eu teve Sirasi pē. Mōrijō erā. ^d 5.13 Romā pewarā mō “Papironi taa” e'i. Emogeta J.Jim. 17.5; 18.1—19.4 ^e 5.13 Juwāo Maku pewarā mō maevo aepo e'i. Emogeta Krs. 4.10